



劉向新序卷第六

刺奢第六

陽朔元年三月癸卯護奉水使者光祿大夫臣劉向上

桀作瑤臺罷民力殫民財為酒池糟隄縱靡靡之樂一鼓而牛飲者三千人群臣相持歌曰江水沛沛兮舟楫敗兮我王廢兮趣歸薄兮薄亦大兮又曰樂兮樂兮四牡蹻兮六轡沃兮去不善而從善何不樂兮伊尹知天命之至舉觴而告桀曰君王不聽臣之言亡無日矣桀拍然而作啞然而笑曰子何妖言吾有天下如天之有日也日有亡乎日亡吾亦亡矣於是接履而趨遂適湯湯立為相故伊尹去官入殷殷在而夏

紂為鹿臺七年而成其大三里高千尺臨望雲
雨作炮烙之刑戮無辜奪民力寃暴施於百姓
慘毒加於大臣天下叛之願臣文王及周師至
令不行於左右悲夫當是時求為西夫不可得
也紂自取之也

魏王將起中天臺令曰敢諫者死許綰曾孫鍾
入曰聞大王將起中天臺臣願加一力王曰子
何力有加綰曰雖無力能商臺王曰若何曰臣
聞天與地相去萬五千里今王因而半之臺起
起阡五百里之臺高既如是其趾須方八千里

盡王之地不足以為臺趾古者堯舜之諸侯地
方五千里王必起此臺先以兵伐諸侯盡有其
地猶不足又伐四夷得方八千里乃足以為臺
趾林木之積人徒之衆倉廩之儲數以萬億度
八千里之外當定農畝之地足以奉給王之臺
者臺且或備乃可以作魏王默然無以應乃罷
起臺

衛靈公以天寒鑿池宛春諫曰天寒起役恐傷
民公曰天寒乎宛春曰君衣狐裘坐魚席陳隔
有竈是以不寒今民衣弊不補履決不苴君則
不寒民誠寒矣公曰善令罷役左右諫曰君鑿

池不知天寒以宛春知而罷役是德歸宛春怨歸於君公曰不然宛春魯國之匹夫吾舉之民未有見焉今將令民以此見之豈春也有善寡人有春之善非寡人之善與靈公論宛春可謂知君之道矣

齊宣王爲大室大蓋百畝堂上三百戶以齊國之大具之三年而未能成群臣莫敢諫者香居問宣王曰荆王釋先王之禮樂而爲淫樂敢問荆邦爲有主乎王曰爲無主敢問荆邦爲有臣乎王曰爲無臣居曰今王爲大室三年不能成而群臣莫敢諫者敢問吾爲有臣乎王曰爲無

臣香居曰臣請避矣趨而出王曰香子留何諫寡人之晚也遽召尚書曰書之寡人不肖好爲大室香子止寡人也

趙襄子飲酒五日五夜不廢酒謂侍者曰我誠邦士也夫飲酒五日五夜矣而殊不病優莫曰君勉之不及紂二日耳紂七日七夜今君五日襄子懼謂優莫曰然則吾亡乎優莫曰不亡襄子曰不及紂二日耳不亡何待優莫曰桀紂之亡也遇湯武今天下盡桀也而君紂也桀紂並世焉能相亡然亦殆矣

齊景公飲酒而樂釋衣冠自鼓缶謂侍者曰仁

人亦樂是夫梁丘子曰仁人耳目亦猶人也奚
爲獨不樂此也公曰速駕迎晏子晏子朝服以
至公曰寡人甚樂此樂也願與夫子共之請去
禮晏子對曰君之言過矣齊國五尺之童子力
盡勝嬰而又勝君所以不敢亂者畏禮也上若
無禮無以使其下下若無禮無以事其上夫麋
鹿唯無禮故父子同麋人之所以貴於禽獸者
以有禮也詩曰人而無禮胡不遄死故禮不可
去也公曰寡人無良左右淫酒寡人以此至於此
請殺之晏子曰左右何罪君若好禮左右有禮
者至無禮者去君若惡禮亦將如之公曰善請

革衣冠更受命乃廢酒而更尊朝服而坐觴三
行晏子趨出

魏文侯見箕季其牆壞而不築文侯曰何爲不
築對曰不時其牆枉而不端問曰何不端曰固
然從者食其園之桃箕季禁之少焉日晏進糲
餐之食瓜瓠之美文侯出其僕曰君亦無得於
箕季矣曩者進食臣竊窺之糲餐之食瓜瓠之
羹文侯曰吾何無得於季也吾一見季而得四
焉其牆壞不築云待時者教我無奪農時也牆
枉而不端對曰固然者是教我無侵封疆也從
者食園桃箕季禁之豈愛桃哉是教我下無侵

上也食我以糲餐者季豈不能具五味哉教我無多歛於百姓以省飲食之養也

士尹池為荆使於宋司城子罕止而觴之南家之牆擁於前而不直西家之潦經其宮而不止士尹池問其故司城子罕曰南家工人也為鞞者也吾將徙之其父曰吾恃為鞞已食三世矣今徙是宋邦之求鞞者不知吾處也吾將不食願相國之憂吾不食也為是故吾不徙西家高吾宮卑潦之經吾宮也利為是故不禁也士尹池歸荆適與兵欲攻宋士尹池諫於王曰宋不可攻也其主賢其相仁賢者得民仁者能用人

攻之無功為天下笑楚釋宋而攻鄭孔子聞之曰夫修之於廟堂之上而折衝於千里之外者司城子罕之謂也

魯孟獻子聘於晉宣子觴之三徙鍾石之懸不移而具獻子曰富哉家宣子曰子之家孰與我家富獻子曰吾家甚貧惟有二士曰顏回茲無靈者使吾邦家安平百姓和協惟此二者耳吾盡於此矣客出宣子曰彼君子也以養賢為富我鄙人也以鍾石金玉為富孔子曰孟獻子之富可著於春秋

鄒穆公有令食鳧鴈必以糲無得以粟於是倉

無糶而求易於民二石粟而得一石糶吏以為
費請以粟食之穆公曰去非汝所知也夫百姓
飽牛而耕暴背而耘勤而不惰者豈為鳥獸哉
粟米人之上食奈何其以養鳥且爾知小計不
知大會周諺曰囊漏貯中而獨不聞歟夫君者
民之父母取倉之粟移之於民此非吾之粟乎
鳥苟食鄒之糶不害鄒之粟也粟之在倉與在
民於我何擇鄒民聞之皆知私積與公家為一
體也此之謂知富邦

劉向新序卷第六

劉向新序卷第七

節士第七

陽朔元年二月癸卯議在都水使者光祿大夫臣劉向上

堯治天下伯成子高為諸侯焉堯授舜舜授禹
伯成子高辭為諸侯而耕禹往見之則耕在野
禹趨就下位而問焉曰昔者堯治天下吾子立
為諸侯焉堯授舜吾子猶存焉及吾在位子辭
諸侯而耕何故伯成子高曰昔堯之治天下舉
天下而傳之他人至無欲也擇賢而與之其位
至公也以至無欲至公之行示天下故不賞而
民勸不罰而民畏舜亦猶然今君賞罰而民欲
且多私是君之所懷者私也百姓知之貪爭之

端自此始矣德自此衰刑自此繁矣吾不忍見以是處野也今君又何求而見我君行矣無留吾事耕而不顧書曰旁施象刑維明及禹不能春秋曰五帝不告誓信厚也

桀為酒池足以運舟糟立足以望七里一鼓而牛飲者三千人關龍逢進諫曰為人君身行禮義愛民節財故國安而身壽也今君用財若無盡用人若恐不能死不革天禍必降而誅必至矣君其革之立而不去朝桀因囚拘之君子聞之曰末之命矣夫

紂作炮烙之刑王子比干曰主暴不諫非忠臣

末命末本
本念

也畏死不言非勇士也見過則諫不用則死忠之至也遂進諫三日不去朝紂因而殺之詩曰昊天太憮予慎無辜無辜而死不亦哀哉

子宗本

曹公子喜時字子臧曹宣公子也宣公與諸侯伐秦卒於師曹人使子臧迎喪使公子負芻與太子留守負芻殺太子而自立子臧見負芻之當主也宣公既葬子臧將亡國人皆從之負芻立是為曹成公成公懼告罪且請子臧子臧乃反成公遂為君其後晉侯會諸侯執曹成公歸之京師將見子臧於周天子而立之子臧曰前記有之聖達節次守節不失節為君非吾節

也雖不能聖敢失守乎遂亡奔宋曹人數請晉侯謂子臧反國吾歸爾君於是子臧反國晉乃言天子歸成公於曹子臧遂以國致成公成公爲君子臧不出曹國乃安子臧讓千乘之國可謂賢矣故春秋賢而褒其後

延陵季子者吳王之子也嫡同母昆弟四人長曰遏次曰餘祭次曰夷昧次曰札札即季子最小而賢兄弟皆愛之旣除喪將立季子季子辭曰曹宣公之卒也諸侯與曹人不義曹君將立子臧子臧去之遂不爲也以成曹君君子曰能守節矣君義嗣也誰敢干君有國非吾節也札

雖不才願附子臧以無失節固立之棄其室而耕乃舍之遏曰今若是作而與季子季子必不受請無與子而與弟弟兄迭爲君而致諸侯乎季子皆曰諾故諸其爲君者皆輕死爲勇飲食必祝曰天若有吾國必疾有禍予身故遏也死餘祭立餘祭死夷昧立夷昧死而國宜之季子也季子使而未還僚者長子之庶兄也自立爲吳王季子使而還至則君事之遏之子曰王子光號曰闔閭不悅曰先君之所爲不與子而與弟者凡爲季子也將從先君之命則國宜之季子也如不從先君之命而與子我宜當立者也

僚惡得爲君於是使專諸刺僚而致國乎季子
季子曰爾殺我君吾授爾國是吾與爾爲亂也
爾殺我兄吾又殺爾是父子兄弟相殺終身無
已也去而之延陵終身不入吳國故號曰延陵
季子君子以其不受國爲義以其不殺爲仁是
以春秋賢季子而尊貴之也

延陵季子將西聘晉帶寶劍以過徐君徐君觀
劍不言而色欲之延陵季子爲有上國之使未
獻也然其心許之矣致使於晉故反則徐君死
於楚於是脫劍致之嗣君從者止之曰此吳國
之寶非所以贈也延陵季子曰吾非贈之也先

日吾來徐君觀吾劍不言而其色欲之吾爲有
上國之使未獻也雖然吾心許之矣今死而不
進是欺心也愛劍僞心廉者不爲也遂脫劍致
之嗣君嗣君曰先君無命孤不敢受劍於是季
子以劍帶徐君墓樹而去徐人嘉而歌之曰延
陵季子首不忘故脫千金之劍兮帶丘墓

許悼公疾瘡飲藥毒而死太子止自責不嘗藥
不立其位與其弟纘專哭泣啜餼粥啞不容粒
痛已之不嘗藥未逾年而死故春秋義之
衛宣公之子伋也壽也朔也伋前母子也壽與
朔後母子也壽之母與朔謀欲殺太子伋而立

壽也使人與伋乘舟於河中將沉而殺之壽知不能止也因與之同舟舟人不得殺伋方乘舟時伋傅母恐其死也閔而作詩二子乘舟之詩是也其詩曰二子乘舟汎汎其景願言思子中心養養於是壽閔其兄之且見害作憂思之詩黍離之詩是也其詩曰行邁靡靡中心搖搖知我者謂我心憂不知我者謂我何求悠悠蒼天此何人哉又使伋之齊將使盜見載旌要而殺之壽止伋曰棄父之命非子道也不可壽又與之偕行壽之母知不能止也因戒之曰壽無爲前也壽又爲前竊伋旌以先行幾及齊矣盜見而殺之伋至見壽之死痛其代已死涕泣悲哀遂載其屍還至境而自殺兄弟俱死故君子義此二人而傷宣公之聽讒也

魯宣公者魯文公之弟也文公薨文公之子子赤立爲魯侯宣公殺子赤而奪之國立爲魯侯公子勝者宣公之同母弟也宣公殺子赤而勝非之宣公與之祿則曰我足矣何以兄之食爲哉織屨而食終身不食宣公之食其仁恩厚矣其守節固矣故春秋美而貴之

晉獻公太子之至靈臺虵繞左輪御曰太子下拜吾聞國君之子虵繞左輪者速得國太子遂

不行返乎舍御人見太子太子曰吾聞為人子者盡和順君不行私欲恭嚴承命不逆君安今吾得國是君失安也見國之利而忘君安非子道也聞得國而拜其聲非君欲也廢子道不孝逆君欲不忠而使我行之殆欲吾國之危明也拔劍將死御止之曰夫機祥妖孽天之道也恭嚴承命人之行也拜祥戒孽禮也恭嚴承命不以身恨君孝也今太子見福不拜失禮殺身恨君失孝從僻心棄正行非臣之所聞也太子曰不然我得國君之孽也拜君之孽不可謂禮見機祥而忘君之安國之賊也懷賊心以事君不

機祥本機下同

可謂孝挾偽意以御天下懷賊心以事君邪之大者也而使我行之是欲國之危明也遂伏劍而死君子曰晉太子徒御使之拜地祥猶惡之至於自殺者為見疑於欲國也已之不欲國以安君亦以明矣為一愚御過言之故至於身死廢子道絕祭祀不可謂孝可謂遠嫌一節之士也

申包胥者楚人也吳敗楚兵於柏舉遂入郢昭王出亡在隨申包胥不受命而赴於秦乞師曰吳為無道行封豕長蛇蠶食天下從上國始於楚寡君失社稷越在草莽使下臣告急曰吳夷

狄也夷狄之求無厭滅楚則西與君接境若鄰於君疆場之患也遠吳之未定君其圖之若得君之靈存撫楚國世以事君秦伯使辭焉曰寡君聞命矣子其就館將圖而告子對曰寡君越在草莽未獲所休下臣何敢即安倚於庭牆立哭日夜不絕聲水漿不入口七日七夜秦哀公為賦無衣之詩言兵今出包胥九頓首而坐秦哀公曰楚有臣若此而亡吾無臣若此吾亡無日矣於是乃出師救楚申包胥以秦師至楚秦大夫子滿子虎帥車五百乘子滿曰吾未知吳道使楚人先與吳人戰而會之大敗吳師吳師

既退昭王復國而賞始於包胥包胥曰輔君安國非為身也救急除害非為名也功成而受賞是賣勇也君既定又何求焉遂逃賞終身不見君子曰申子之不受命赴秦忠矣七日七夜不絕聲厚矣不受賞不伐矣然賞所以勸善也辭賞亦非常法也

齊崔杼者齊之相也弒莊公止太史無書君弒及賊太史不聽遂書賊曰崔杼弒其君崔子殺之其弟又嗣書之崔子又殺之死者二人其弟又嗣復書之乃舍之南史氏是其族也聞太史盡死執簡以往將復書之聞既書矣乃還君子

曰古之良史

齊攻魯求岑鼎魯君載岑鼎往齊侯不信而反之以爲非也使人告魯君柳下惠以爲是因請受之請魯君請於柳下惠柳下惠對曰君之欲以爲岑鼎也以免國也臣亦有國於此破臣之國以免君之國此臣所難也魯君乃以真岑鼎往柳下惠可謂守信矣非獨存己之國也又存魯君之國信之於人重矣猶輿之輓輓也故孔子曰大輿無輓小輿無輓其何以行之哉此之謂也

宋人有得玉者獻諸司城子罕子罕不受獻玉

者曰以示玉人玉人以爲寶故敢獻之子罕曰我以不貪爲寶爾以玉爲寶若與我者皆喪寶也不若人有其寶故宋國之長者曰子罕非無寶也所寶者異也今以百金與搏黍以示兒子兒子必取搏黍矣以和氏之璧與百金以示鄙人鄙人必取百金矣以和氏之璧與道德之至言以示賢者賢者必取至言矣其知彌精其取彌精其知彌拙其取彌拙子罕之所寶者至矣昔者有餽魚於鄭相者鄭相不受或謂鄭相曰子嗜魚何故不受對曰吾以嗜魚故不受魚受魚失祿無以食魚不受得祿終身食魚

原憲居魯環堵之室茨以生蒿蓬力甕牖揉桑
以爲樞上漏下濕匡坐而弦歌子貢聞之乘肥
馬衣輕裘中紺而表素軒車不容巷往見原憲
原憲冠園葉冠杖藜杖而應門正冠則纓絕衽
襟則肘見納履則踵決子貢曰嘻先生何病也
原憲仰而應之曰憲聞之無財之謂貧學而不
能行之謂病憲貧也非病也若夫希世而行比
周而交學以爲人教以爲己仁義之慝與馬之
讎憲不忍爲也子貢逡巡面有愧色不辭而去
原憲曳杖拖履行歌商頌而反聲滿天地如出
金石天子不得而臣也諸侯不得而友也故養

宋本冠
葉冠無
桑字

志者忘身身且不愛孰能累之詩曰我心匪石
不可轉也我心匪席不可卷也此之謂也

晏子之晉見披裘負芻息於途者以爲君子也
使人問焉曰曷爲而至此對曰齊人累之吾名
曰越石甫晏子曰嘻遽解左驂以贖之載而與
歸至舍不辭而入越石甫怒而請絕晏子使人
應之曰嬰未嘗得交也今免子於患吾於子猶
未可耶越石甫曰吾聞君子誦乎不知己而信
乎知己者吾是以請絕也晏子乃出見之曰向
也見客之容而今也見客之意嬰聞察實者不
留聲觀行者不幾辭嬰可以辭而無弃乎越石

曰宋本
云

甫曰夫子禮之敢不敬從晏子遂以爲上客俗人之有功則德德則驕晏子有功免人於厄而反詘下之其去俗亦遠矣此全功之道也

子列子窮容貌有飢色客有言於鄭子陽者曰子列子禦寇蓋有道之士也居君之國而窮君無乃爲不好士乎子陽令官遺之粟數十乘子列子出見使者再拜而辭使者去子列子入其妻望而拊心曰聞爲有道者妻子皆得佚樂今妻子皆有飢色矣君過而遺先生先生又辭豈非命也哉子列子笑而謂之曰君非自知我者也以人之言而知我以人之言而遺我粟也其

罪我也又將以人之言此吾所以不受也且受人之養不死其難不義也死其難是死無道之人豈義哉其後民果作難殺子陽子列子之見微除不義遠矣且子列子內有飢寒之憂猶不苟取見得思義見利思害况其在富貴乎故子列子通乎性命之情可謂能守節矣

屈原者名平楚之同姓大夫有博通之知清潔之行懷王用之秦欲吞滅諸侯并兼天下屈原爲楚東使於齊以結彊黨秦國患之使張儀之楚貨楚貴臣上官大夫靳尚之屬上及令尹子蘭司馬子椒內賂夫人鄭袖共譖屈原屈原遂

放於外乃作離騷張儀因使楚絕齊許謝地六
百里懷王信左右之姦謀聽張儀之邪說遂絕
強齊之大輔楚既絕齊而秦欺以六里懷王大
怒舉兵伐秦大戰者數秦兵大敗楚師斬首數
萬級秦使人願以漢中地謝懷王不聽願得張
儀而甘心焉張儀曰以一儀而易漢中地何愛
儀請行遂至楚楚囚之上官大夫之屬共言之
王王歸之是時懷王悔不用屈原之策以至於
此於是復用屈原屈原使齊還聞張儀已去大
為王言張儀之罪懷王使人追之不及後秦嫁
女于楚與懷王歡為藍田之會屈原以為秦不

可信願勿會群臣皆以為可會懷王遂會果見
囚拘客死於秦為天下笑懷王子頃襄王亦知
群臣諂誤懷王不察其罪反聽群讒之口復放
屈原屈原疾闇主亂俗汶汶嘿嘿以是為非以
清為濁不忍見汙世將自投於淵漁父止之屈
原曰世皆醉我獨醒世皆濁我獨清吾獨聞之
新浴者必振衣新沐者必彈冠又惡能以其冷
冷更事之之嘿嘿者哉吾寧投淵而死遂自投
湘水汨羅之中而死

楚昭王有士曰石奢其為人也公正而好義王
使為理於是廷有殺人者石奢追之則其父也

近刺作
事在之
嘿嘿者
宋本無
世字

遂反於廷曰殺人者僕之父也以父成政不孝不行君法不忠施罪廢法而伏其辜僕之所守也伏斧鑕命在君君曰追而不及庸有罪乎子其治事矣石奢曰不私其父非孝也不行君法非忠也以死罪生非廉也君赦之上之惠也臣不敢失法下之行也遂不離鉄鑕刎頸而死于廷中君子聞之曰貞夫法哉孔子曰子爲父隱父爲子隱直在其中矣詩曰彼已之子邦之司直石子之謂也

晉文公反國李離爲大理過殺不辜自繫曰臣之罪當死文公令之曰官有上下罰有輕重是下吏之罪也非子之過也李離曰臣居官爲長不與下讓位受祿爲多不與下分利過聽殺無辜委下畏死非義也臣之罪當死矣文公曰子必自以爲有罪則寡人亦有過矣李離曰君量能而授官臣奉職而任事臣受印綬之日君命曰必以仁義輔政寧過於生無失於殺臣受命不稱壅惠蔽恩如臣之罪乃當死君何過之有耳理有法失生即生失殺即死君以臣爲能聽微決疑故任臣以理今離刻深不顧仁義信文墨不察是非聽他辭不精事實掠服無罪使百姓怨天下聞之必議吾君諸侯聞之必輕吾國

怨積於百姓惡揚於天不權輕於諸侯如臣之
罪是當重死文公曰吾聞之也直而不枉不可
與往方而不圓不可與長存願子以此聽寡人
也李離曰君以所私害公法殺無罪而生當死
二者非所以教於國也離不敢受命文公曰子
獨不聞管仲之爲人臣耶身辱而君肆行汙而
霸王之功而有射鉤之累夫無能以臨官籍汙
以治人君雖不忍加之於法臣亦不敢汙官亂
治以生臣聞命矣遂伏劍而死

晉文公反國酌士大夫酒召咎犯而將之召艾
陵而相之授田百萬介子推無爵齒而就位觴
三行介子推奉觴而起曰有龍矯矯將失其所
有虵從之周流天下龍旣入深淵得其安所虵
脂盡乾獨不得甘雨此何謂也文公曰嘻是寡
人之過也吾爲子爵與待旦之朝也吾爲子田
與河東陽之閒介子推曰推聞君子之道謁而
得位道士不居也爭而得財廉士不受也文公
曰使我得反國者子也吾將以成子之名介子
推曰推聞君子之道爲人子而不能承其父者
則不敢當其後爲人臣而不見察於其君者則
不敢立於其朝然推亦無索於天下矣遂去而

之介山之上。文公使人求之，不得爲之避寢。三月號呼，暮年詩曰：逝將去汝，適彼樂郊。適彼樂郊，誰之永號？此之謂也。文公待之不肯出，求之不能得，以謂焚其山宜出，及焚其山，遂不出而焚死。

申徒狄非其世，將自投於河。崔嘉聞而止之，曰：吾聞聖人仁士之於天地之間，民之父母也。今爲濡足之故，不救溺人，可乎？申徒狄曰：不然。昔者桀殺關龍逢，紂殺王子比干而亡天下，吳殺子胥，陳殺洩冶而滅其國，故亡國殘家，非聖智也不用故也。遂負石沉於河。君子聞之，曰：廉矣。乎如仁與智，吾未見也。詩曰：天實爲之，謂之何哉？此之謂也。

齊大飢，黔敖爲食於路，以待餓者而食之。有餓者蒙袂，接履，貿貿然來。黔敖左奉食，右執飲，曰：嗟來食。餓者揚其目而視之，曰：予唯不食嗟來之食，以至於此也。從而謝焉，終不食而死。曾子聞之，曰：微與其嗟也，可去其謝也，可食。

東方有士曰袁族，目將有所適而飢於道。狐父之盜丘人也，見之下壺餐，以與之。袁族目三鋪而能視，仰而問焉，曰：子誰也？曰：我狐父之盜丘人也。袁族目曰：嘻，汝乃盜也，何爲而食我以吾

不食也。兩手據地而歐之，不出，喀喀然遂伏地而死。縣名爲勝，毋魯子不入邑。號朝歌。墨子曰：車故孔子席不正不坐，割不正不食，不飲盜泉之水，積正也。族目不食而死，潔之至也。

鮑焦衣弊膚見潔，魯將蔬，遇子贛於道。子贛曰：吾子何以至此也？焦曰：天下之遺德教者衆矣，吾何以不至於此也？吾聞之，世不已知而行之不已者，是爽行也。上不巳知而干之不止者，是毀廉也。行爽廉毀，然且不舍，惑於利者也。子贛曰：吾聞之，非其世者不生，其利汙其君者不履其土。今吾子汙其君而履其土，非其世而將其

蔬，此誰之有哉？鮑焦曰：嗚呼！吾聞賢者重進而輕退，廉者易醜而輕死，乃弃其蔬而立槁死於洛水之上。君子聞之曰：廉夫剛哉！夫山銳則不高，水狹則不深，行特者其德不厚，志與天地疑者其爲人不祥。鮑子可謂不祥矣！其節度淺深，適至而止矣。詩曰：已焉哉！天實爲之，謂之何哉？公孫杵臼程嬰者，晉大夫趙朔客也。晉趙穿弒靈公，趙盾時爲貴大夫，亡不出境，還不討賊，故春秋責之。以盾爲弒君屠岸賈者，幸於靈公。晉景公時，賈爲司寇，欲討靈公之賊，盾已死，欲誅盾之子，轉朔徧告諸將曰：盾雖不知，猶爲首賊。

賊臣弑君子孫在朝何以懲罪請誅之韓厥曰
靈公遇賊趙盾在外吾先君以爲無罪故不誅
今諸君將妄誅妄誅謂之亂臣有大事君不聞
是無君也屠岸賈不聽韓厥告趙朔趣亡趙朔
不肯曰子必不絕趙祀予死不恨韓厥許諾稱
疾不出賈不請而擅與諸將攻趙氏於下宮殺
趙朔趙同趙括趙嬰齊皆滅其族趙朔妻成公
姊有遺腹走公宮匿公孫杵臼謂程嬰胡不死
嬰曰朔之妻有遺腹若幸而男吾奉之即女也
吾徐死耳無何而朔妻免生男屠岸賈聞之索
於宮朔妻置兒袴中祝曰趙宗滅乎若號

滅乎若無聲及索兒竟無聲已脫程嬰謂杵臼
曰今一索不得後必且復之奈何杵臼曰立孤
與死孰難嬰曰立孤亦難耳杵臼曰趙氏先君
遇子厚子強爲其難者吾爲其易者吾請先死
而二人謀取他嬰兒負以文襟匿山中嬰謂諸
將曰嬰不肖不能立孤誰能與吾千金吾告趙
氏孤處諸將皆喜許之發師隨嬰攻杵臼杵臼
曰小人哉程嬰下宮之難不能死與我謀匿趙
氏孤兒今又賣之縱不能立孤兒忍賣之乎抱
而呼天乎趙氏孤兒何罪請活之獨殺杵臼也
諸將不許遂并殺杵臼與兒諸將以爲趙氏孤

兒已死皆喜然趙氏真孤兒乃在程嬰卒與俱
匿山中居十五年晉景公病卜之大業之冑者
為崇景公問韓厥韓厥知趙孤存乃曰大業之
後在晉絕祀者其趙氏乎夫自中行衍皆嬴姓
也中行衍人面鳥喙降佐帝大戊及周天子皆
有明德下及幽厲無道而叔帶去周適晉事先
君繆侯至于成公世有立功未嘗絕祀今及吾
君獨滅之趙宗國人哀之故見龜策唯君圖之
景公問趙尚有後子孫乎韓厥具以實告景公
乃與韓厥謀立趙孤兒召圻之宮中諸將入問
病景公因韓厥之衆以脅諸將而見趙孤兒孤

兒名武諸將不得已乃曰昔下宮之難屠岸賈
為之矯以君命并命群臣非然孰敢作難微君
之病群臣固將請立趙後今君有命群臣願之
於是召趙氏程嬰徧拜諸將遂俱與程嬰趙氏
攻屠岸賈滅其族復與趙氏田邑如故趙武冠
為成人程嬰乃辭大夫謂趙武曰昔下宮之難
皆能死我非不能死思立趙氏後今子既立為
成人趙宗復故我將不報趙孟與公孫杵曰趙
武號泣固請曰武願苦筋骨以報子至死而子
忍棄我死乎程嬰曰不可彼以我為能成事故
皆先我死今我不下報之是以我事為不成也

遂自殺趙武服衰三年爲祭邑春秋祠之世不絕君子曰程嬰公孫杵曰可謂信交厚士矣嬰之自殺下報亦過矣

吳有士曰張胥鄙譚夫吾前交而後絕張胥鄙有罪拘將死譚夫吾合徒而取之出至於道而後乃知其夫吾也輟行而辭曰義不同於子故前交而後絕吾聞之君子不爲危易行今吾從子是安則肆志危則易行也與吾因子而生不若反拘而死闔閭聞之令吏釋之張胥鄙曰吾義不同於譚夫吾故不受其任矣今吏以是出我以譚夫吾故免也吾庸遽受之乎遂觸牆而

死譚夫吾聞之曰我任而不受佞也不知而出之愚也佞不可以接士愚不可以事君吾行虛矣人惡以吾力生吾亦耻以此立於世乃絕頸而死君子曰譚夫吾其以失士矣張胥鄙亦未爲得也可謂剛勇矣未可謂得節也

蘇武者故右將軍平陵侯蘇建子也孝武皇帝時以武爲移中監使匈奴是時匈奴使者數降漢故匈奴亦欲降武以取當單于使貴人故漢人衛律說武武不從乃設以貴爵重祿尊位終不聽於是律絕不與飲食武數日不降又當盛夏以旃厚衣并束三日暴武心意愈堅終不屈

撓稱曰臣事君由子事父也子為父死無所恨
守節不移雖有鐵鉞湯鑊之誅而不懼也尊官
顯位而不榮也匈奴亦由此重之武留十餘歲
竟不降下可謂守節臣矣詩云我心匪石不可
轉也我心匪席不可卷也蘇武之謂也匈奴給
言武死其後漢聞武在使使者求武匈奴欲慕
義歸武漢尊武以為典屬國顯異於他臣也

劉向新序卷第七

劉向新序卷第八

陽朔元年二月癸卯護左都水使者光祿大夫臣劉向上

義勇第八

陳恒弑簡公而盟者皆完其家不盟者殺之石
他人曰昔之事其君者皆得其君而事之今謂
他人曰舍而君而事我他人不能雖然不盟則
殺父母也從而盟是無君臣之禮也生於亂世
不得正行劫於暴上不得道義故雖盟不以父
母之死不如退而自殺以禮其君乃自殺
陳恒弑君使勇士六人劫子淵棲子淵棲曰子
之欲與我以為我為知乎臣弑君非知也以為
仁乎見利而背君非仁也以為勇乎劫我以

兵懼而與子非勇也使吾無此三者與何補於子若吾有此三者終不從子矣乃舍之

宋閔公臣長萬以勇力聞萬與魯戰師敗為魯所獲囚之宮中數月歸之宋宋閔公博婦人在側公謂萬曰魯君孰與寡人美萬曰魯君美天下諸侯唯魯君耳且其為君也閔公矜婦人妬因言曰爾魯之囚虜爾何知萬怒遂搏閔公頰齒落於口絕吭而死仇牧聞君死趨而至遇萬於門携劔而叱之萬臂擊仇牧而殺之齒著於門闔仇牧可謂不畏彊禦矣趨臣之難顧不旋踵

臣宋本同疑作君

崔杼弑莊公令士大夫盟者皆脫劔而入言不疾指不至血者死所殺十人次及晏子晏子奉栝血仰天歎曰惡乎崔子將為無道殺其君盟者皆視之崔杼謂晏子曰子與我我與子分國子不吾與吾將殺子直兵將推之曲兵將勾之唯子圖之晏子曰嬰聞回以利而背其君者非仁也劫以刃而失其志者非勇也詩云愷悌君子求福不回嬰可謂不回矣直兵推之曲兵鋤之嬰不之回也崔子舍之晏子趨出授綏而垂其僕將馳晏子拊其手曰虎豹在山林其命在庖厨馳不益生緩不益死按之成節然後去之

詩云彼己之子含命不渝晏子之謂也

佛肸以中牟叛置鼎於庭致士大夫曰與我者

受邑不吾與者烹大夫皆從之至於田單田單中牟之邑人也

曰義死不避斧鉞之罪義窮不受軒冕之服無

義而生不仁而富不如烹褰衣將就鼎佛肸脫履

而生之趙氏聞其叛也攻而取之聞田單不肯

與也求而賞之田單曰不可也一人舉而萬夫

俛首智者不為也賞一人以慙萬夫義者不取

也我受賞使中牟之士懷恥不義辭賞從處曰

以行臨人不道吾去矣遂南之楚

楚太子建以費無極之讖見於建有子曰勝在

外子西召勝使治白號曰白公子西太子建之弟勝之叔父也勝怨楚

逐其父將弑惠王及子西惠王太子西之叔也欲得易甲姓

陳士勒兵以示易甲曰與我無患不富貴不吾

與則此是也易甲笑曰嘗言吾義矣吾子忘之

乎立得天下不義吾不取也威吾以兵不義吾

不從也今子將弑子之君而使我從子非吾前

義也子雖告我以利威我以兵吾不忍為也子

行子之威則吾亦得明吾義也逆子以兵爭也

應子以聲讎也吾聞士立義不爭行死不讎拱

而待兵顏色不變也

白公勝將弑楚惠王王出亡令尹司馬皆死拔

劍而屬之於屈廬曰子與我將舍子子不與我必殺子廬曰子殺叔父而求福於廬也可乎吾聞知命之士見利不動臨死不恐為人臣者時生則生時死則死是謂人臣之禮故上知天命下知臣道其有可劫乎子胡不推之白公勝乃內其劍

白公勝既殺令尹司馬欲立王子閭以爲王王子閭不肯劫之以刃王子閭曰王孫輔相楚國匡正王室而后自庇焉閭之願也今子假威以暴王室殺伐以亂國家吾雖死不子從也白公勝曰楚國之重天下無有天以與子子何不受

也王子閭曰吾聞辭天下者非輕其利也以明其德也不爲諸侯者非惡其位也以絜其行也今吾見國而忘主不仁也劫白刃而失義不勇也子雖告我以利威我以兵吾不爲也白公強之不可遂殺之葉公高率衆誅白公而反惠王於國

白公之難楚人有莊善者辭其母將往死之其母曰棄其親而死其君可謂義乎莊善曰吾聞事君者內其祿而外其身今所以養母者君之祿也身安得無死乎遂辭而行比至公門三廢車中其僕曰子懼矣曰懼既懼何不返莊善

曰懼者吾私也死義吾公也聞君子不以私害公及公門刎頸而死君子曰好義乎哉齊崔杼弑莊公也有陳不占者聞君難將赴之比去餐則失心上車失軾御者曰怯如是去有益乎不占曰死君義也無勇私也不以私害公遂往聞戰鬪之聲恐駭而死人曰不占可謂仁者之勇也

知伯囂之時有士曰長兒子魚絕知伯而去之三年將東之越而道聞知伯囂之見殺也謂御曰還車反吾將死之御曰夫子絕知伯而去之三年矣今反死之是絕屬無別也長兒子魚曰不然吾聞仁者無餘愛忠臣無餘祿吾聞知伯之死而動吾心餘祿之加於我者至今尚存吾將往依之反而死

衛懿公有臣曰弘演遠使未還狄人攻衛其民曰君之所與祿位者鶴也所富者宮人也君使宮人與鶴戰余焉能戰遂潰而去狄人追及懿公於滎澤殺之盡食其肉獨舍其肝弘演至報使於肝畢呼天而號盡哀而止曰臣請為表因自刺其腹內懿公之肝而死齊桓公聞之曰衛之亡也以無道今有臣若此不可不存於是救衛於楚丘

芊尹文者荆之歐鹿彘者也司馬子期獵於雲
夢載旗之長拖地芊尹文拔劍齊諸軫而斷之
貳車抽弓於鞬援矢於箛引而未發也司馬子
期伏軾而問曰吾有罪於夫子乎對曰臣以君
旗拽地故也國君之旗齊於軫大夫之旗齊於
軾今子荆國有名大夫而滅三等文之斷也不
亦可乎子期悅載之王所王曰吾聞有斷子之
旗者其人安在吾將殺之子期以文之言告王
悅使文為江南令而大治

卞莊子好勇養母戰而三北交遊非之國君辱
之及母死三年冬與魯戰卞莊子請從見於魯

今上疑
當有不
字

與魯上
疑有脫

將軍曰初與母處是以三北今母死請塞責而
神有所歸遂赴敵獲一甲首而獻之曰此塞一
北又入獲一甲首而獻之曰此塞再北又入獲
一甲首而獻之曰此塞三北將軍曰母沒爾家
宜止之請為兄弟莊子曰三北以養母也是子
道也今士節小具而塞責矣吾聞之節士不以
辱生遂返敵殺十人而死君子曰三北又塞責
滅世斷家於孝不終也

宋本作
母沒宜
當為母
字

劉向新序卷第九

陽朔元年二月發劾護左都水使者光祿大夫臣劉向上

善謀第九

齊桓公時江國黃國小國也在江淮之間近楚
楚大國也數侵伐欲滅取之江人黃人患楚齊
桓公方存亡繼絕救危扶傾尊周室攘夷狄為
陽穀之會貫澤之盟與諸侯將伐楚江人黃人
慕桓公之義來會盟於貫澤管仲曰江黃遠齊
而近楚楚為利之國也若伐而不能救無以宗
諸侯不可受也桓公不聽遂與之盟管仲死楚
人伐江滅黃桓公不能救君子閔之是後桓公
信壞德衰諸侯不附遂陵遲不能復興夫仁智

之謀即事有漸也力所不能救未可以受其質相
公受之過也管仲可謂善謀矣詩云魯是莫聽
大命以傾此之謂也

晉文公之時周襄王有弟太叔之難出亡居於
鄭不得入使告難于魯于晉于秦其明年春秦
伯師于河上將納王狐偃言於晉文公曰求諸
侯莫如勤王且大義也諸侯信之繼文之業而
信宣於諸侯今為可矣卜偃卜之曰吉遇黃帝
戰於阪泉之兆公曰吾不堪也對曰周禮未改
今之王古之帝也公曰筮之筮之遇大有之
曰吉遇公用享于天子之卦戰克而王享吉

大焉且是卦也天為澤以當日天子降心以迎
公不亦可乎大有去睽而復亦其所也晉侯辭
秦師而下三月甲辰次于陽樊右師圍温左師
逆王夏四月丁巳王入于王城取太叔于温而
殺之于隰城戊午晉侯朝王王享醴命之侑子
之陽樊温原攢茅之田晉於是始開南陽之地
其後三年文公遂再會諸侯以朝天子天子錫之
弓矢秬鬯以為方伯晉文公之命是也卒成霸
道狐偃之謀也夫秦魯皆疑晉有狐偃之善謀
以成霸功故謀得於帷幄則功施於天下狐偃
之謂也

虞虢皆小國也。虞有夏陽之阻塞，虞虢共守之。晉不能禽也。故晉獻公欲伐虞虢，荀息曰：君胡不以屈產之乘與垂棘之璧假道於虞？公曰：此晉國之寶也。彼受吾璧，不借吾道，則如之何？荀息曰：此小之所以事大國也。彼不借吾道，必不敢受吾幣，受吾幣而借吾道，則是我取之中府，置之外府，取之中府，置之外府，公曰：宮之奇存焉，必不使受也。荀息曰：宮之奇知固知矣。雖然，其爲人也通心而懦，又少長於君，則君輕之，且夫之略懦，則不能強諫，少長於君，則君輕之，且夫玩好在耳目之前，而患在一國之後，中知以上

乃能慮之。臣料虞君中知之下也。公遂借道而伐虢，宮之奇諫曰：晉之使者其幣重，其辭卑，必不便於虞。語曰：唇亡則齒寒矣。故虞虢之相救，非相爲賜也。今日亡虢，而明日亡虞矣。公不聽，遂受其幣而借之。道旋歸，四年反取虞。荀息牽馬抱璧而前曰：臣之謀如何？獻公曰：璧則猶是，而吾馬之齒加長矣。晉獻公用荀息之謀而禽虞，虞不用宮之奇謀而亡。故荀息非霸王之佐，戰國兼并之臣也。若宮之奇，則可謂忠臣之謀也。

晉文公秦穆公共圍鄭，以其無禮而附於楚鄭

大夫佚之狐言於鄭君曰若使燭之武見秦君
圍必解鄭君從之召燭之武使之辭曰臣之莊
也猶不如人今老矣無能爲也鄭君曰吾不能
蚤用子今急而求子是寡人之過也然鄭亡子
亦有不利焉燭之武許諾夜出見秦君曰秦晉
圍鄭鄭知亡矣若亡而有益於君敢以煩執事
鄭在晉之東秦在晉之西越晉而取鄭君知其
難也焉用亡鄭以陪晉晉秦之鄰也鄰之強君
之憂也若舍鄭以爲東道主行李之往來共其
資糧亦無所害且君立晉君晉君許君焦瑕朝
得入而夕設版而畫界焉君之所知也夫晉何

厭之有既東取鄭又欲廣其西境不闕秦將焉
取之闕秦而利晉願君圖之秦與說引兵而還
晉咎犯請擊之文公曰不可微夫人之力不能
弊鄭因人之力以弊之不仁失其所與不知以
亂易整不武吾其還矣亦去鄭圍遂解燭之武
可謂善謀一言存鄭而安秦鄭君不蚤用善謀
所以削國也因而覺焉所以得存

楚靈王即位欲爲霸會諸侯使椒舉如晉求諸
侯椒舉致命曰寡君使舉曰君有惠賜盟于宋
曰晉楚之從交相見也以歲之不彘寡人願結
驩於二三君使舉請問君若苟無四方之虞則

願假寵以請於諸侯晉君欲勿許司馬侯曰不可楚王方侈天其或者欲盈其心以厚其毒而降之罰未可知也其使能終亦未可知也唯天所相不可與爭君其許之修德以待其歸若歸於德吾猶將事之況諸侯乎若適淫虐楚將棄之吾誰與爭公曰晉有三不殆其何敵之有國險而多馬齊楚多難有是三者何嚮而不濟對曰恃馬與險而虞隣之難是三殆也四嶽三塗陽城大室荆山終南九州之險也是不一姓冀之北土馬之所生也無與國焉恃險與馬不足以爲固也從古以然是以先王務德音以享神人不聞其務險與馬也或多難以固其國開其疆土或無難以喪其國失其守宗若何虞難齊有仲孫之難而獲桓公至今賴之晉有里克之難而獲文公是以爲盟主衛邢無難狄亦喪之故人之難不可虞也恃此三者而不修政德亡於不暇有何能濟君其許之紂作淫虐文王惠和殷是以實周是以興夫豈爭諸侯哉乃許楚靈王遂爲申之會與諸侯伐吳起章華之臺爲乾谿之役百姓罷勞怨懟於下群臣倍畔於上公子弃疾作亂靈王亡逃卒死於野故曰晉不頓一戰而楚人自亡司馬侯之謀也

楚平王殺伍子胥之父，子胥出亡，挾弓而干闥，問大之，甚勇之。為是而欲興師伐楚，子胥諫曰：「不可。臣聞之，君子不為匹夫興師，且事君猶事父也。虧君之義，復父之讎，臣不為也。」於是止。蔡昭公朝於楚，有美裘，楚令尹囊瓦求之。昭公不予，於是拘昭公於郢，數年而後歸之。昭公濟漢水，沉璧曰：「諸侯有伐楚者，寡人請為前列。」楚人聞之，怒。於是興師伐蔡，蔡請救于吳。子胥諫曰：「蔡非有罪也。楚人無道也。君若有憂中國之心，則若此時可矣。於是興師伐楚，遂敗楚人於柏舉，而成霸道。子胥之謀也。」故春秋美而褒之。

案公羊傳作士之甚勇之甚

諫曰公羊傳作復曰

秦孝公欲用衛鞅之言，更為嚴刑峻法。易古三代之制度，恐大臣不從，於是召衛鞅。甘龍杜摯三大夫御於君，慮世事之變，計正法之本，使民之道。君曰：「代位不亡，社稷君之道也。錯法務明，主長臣之行也。今吾欲更法以教民，吾恐天下之議我也。」公孫鞅曰：「臣聞疑行無名，疑事無功。君亟定變法之慮，行之無疑，殆無顧天下之議。且夫有高人之行者，固負非於世，有獨知之慮者，必見謗於民。語曰：『愚者暗成事，知者見未萌。』民不可與慮始，可與樂成功。郭偃之法曰：『論至德者不和於俗，成大功者不謀於眾。』法者所以

愛民也禮者所以便事也是以聖人苟可以治國不法其故苟可以利民不循其禮孝公曰善甘龍曰不然臣聞聖人不易民而教知者不變法而治因民而教者不勞而功成據法而治者吏習而民安之今君變法不循故更禮以教民臣恐天下之議君願君熟慮之公孫鞅曰子之所言者世俗之所知也常人安於所習學者溺於所聞此兩者所以居官而守法也非所與論於典法之外也三代不同道而王五霸不同法而霸知者作法而愚者制焉賢者更禮不肖者拘焉更禮之人不足與言事制法之人不足與

更宗本
同當作

論治君無疑矣杜摯曰利不百不變法功不什不易器臣聞之法古無過循禮無邪君其圖之公孫鞅曰前世不同教何古之法帝王者不相復何禮之循伏犧神農教而不誅黃帝堯舜誅而不怒及至文武各當其時而立法因事而制禮禮法兩定制令各宜甲兵器備各便其用臣故曰治世不一道便國不必古故湯武之王也不循古殷夏之滅也不易禮然則反古者未可非也循禮者未足多也君無疑矣孝公曰善吾聞窮鄉多怪曲學多辯愚者之笑知者哀焉狂夫之樂賢者憂焉拘世之議人心不疑矣於是

孝公違龍摯之善謀遂從衛鞅之過言法嚴而酷刑深而必守之以公當時取彊遂封鞅為商君及孝公死國人怨商君至於車裂之其患流漸至始皇赤衣塞路群盜蒲山卒以亂亡削刻無恩之所致也三代積德而王齊相繼絕而霸秦項更嚴暴而亡漢王垂仁而帝故仁恩謀之本也

秦惠王時蜀亂國人相攻擊告急於秦惠王欲發兵伐蜀以為道險峽難至而韓人來侵秦秦惠王欲先伐韓恐蜀亂先伐蜀恐韓襲秦之弊猶與未決司馬錯與張子爭論於惠王之前司

馬錯欲伐蜀張子曰不如伐韓王曰請聞其說對曰親魏善楚下兵三川塞什谷之口當屯留

欲宗本以魏宗本衛

之道魏絕南陽楚臨南鄭秦攻新城宜陽以臨二周之郊誅周王之罪侵韓魏之地周自知不救九鼎寶器必出據九鼎按圖籍挾天子以令於天下天下莫敢不聽此王業也今夫蜀西僻之國而戎狄之偷也弊兵勞衆不足以成名得其地不足以為利臣聞爭名者於朝爭利者於市今三川周室天下之朝市也而王不爭焉顧爭於戎狄去王遠矣司馬錯曰不然臣聞之欲富者務廣其地欲彊者務富其民欲王者務博

偷宗本同

其德三資者備而王隨之矣。今王地小民貧，故臣願先從事於易。夫蜀西僻之國而戎狄之長也，有桀紂之亂，以秦攻之，譬如以豺狼逐群羊也。得其地足以廣國，取其財足以富民，繕兵不傷衆而服焉，服一國而天下不以為暴，利盡西海而諸侯不以為貪，是我一舉而名實附也。又有禁暴正亂之名，今攻韓劫天子，惡名也，而未必利也。有不義之名而攻天下所不欲，危矣。臣請謁其故，周天下之宗室也，齊韓之與國也。周自知失九鼎，韓自知亡三川，將二國併力合謀，以因乎齊趙而求解乎楚魏，以鼎予楚，以地予魏，以鼎予楚，以地予魏，王不能止此，臣所謂危也。不如伐蜀。完秦，惠王曰：善。寡人請聽子。卒起兵伐蜀，十月取之，遂定蜀。蜀王更號為侯，而使陳叔相蜀。蜀既屬秦，秦日益彊，富厚而制諸侯，司馬錯之謀也。

楚使黃歇於秦，秦昭王使白起攻韓魏，韓魏服事秦。昭王方令白起與韓魏共伐楚，黃歇適至，聞其計。是時秦已使白起攻楚，取數縣。楚頃襄王東徙，黃歇上書於秦昭王，欲使秦遠交楚而攻韓魏，以解楚。其書曰：天下莫強於秦，楚今聞王欲伐楚，此猶兩虎相與鬪，兩虎相與鬪而驚。

大受其弊也不如善楚臣請言其說臣聞之物
至則反冬夏是也致高則危累基是也今大國
之地徧天下有其二垂此從生民以來萬乘之
地未嘗有也今王使盛橋守事於韓盛橋以其
地入秦是王不用甲不信威而得百里之地也
王可謂能矣王又舉甲而攻魏杜大梁之門
舉河內拔燕酸棗虛桃入邢魏之兵雲翔而不
敢救王之功亦多矣王休甲息衆二年而復之
有取湍作史瀧衍首垣以臨仁平丘黃濟陽魏史作
城而魏氏服王又割濮歷使魏之北注之秦齊
之要絕楚趙之秦天下五合六聚而不敢相救

入宗本
仁按史
作入

之字疑
衍文

王之威亦單矣王若能持功守威挾戰功之心
而肥仁義之地使無後患三王不足四五伯不
足六也王若負人徒之衆兵革之彊乘毀魏之
威而欲以力臣天下之主臣恐其有後患也詩
曰靡不有初鮮克有終易曰狐涉水濡其尾此
言始之易終之難也何以知其然也智伯見伐
趙之利不知榆次之禍吳見伐齊之便而不知
干隧之敗此二國者非無大功也沒利於前而
易患於後也吳之親越也從而伐齊既勝齊人
於艾陵爲越人所禽於三渚之浦知伯之信韓
魏也從而伐趙攻晉陽之城勝有日矣韓魏畔

挾疑作
挾史作
糾
伯宗本
霸

之殺知伯瑤於叢臺之上今王如楚之不毀也
而忘毀楚之強韓魏也臣爲王慮而不取也詩
曰大武遠宅而不涉從此觀之楚國援也鄰國
敵也詩曰躍躍兔兔遇犬獲之他人有心予忖
度之今王中道而信韓魏之善王也此吳之親
越也臣聞之敵不可假時不可失臣恐韓魏卑
辭除患而實欺大國也何則王無重世之德於
韓魏而有累世之怨焉夫韓魏父子兄弟接踵
而死于秦者將十世矣本國殘社稷壞宗廟隳
剝腹絕腸折頸捐頸身首分離暴骨草澤頭顱
僵仆相望于境係臣束子爲群虜者相及於路

鬼神潢洋無所食民不聊生族類離散流亡爲
僕妾者盈海內矣故韓魏之不亡秦社稷之憂
也今王齎之與攻楚不亦過乎且王攻楚將惡
出兵王將藉路於仇讎之韓魏乎兵出之日而
王憂其不反也是王以兵資於仇讎之韓魏也
王若不藉路於仇讎之韓魏必攻隨水右壤此
皆廣川大水山林谿谷不食之地也王雖有之
不爲得地是王有毀楚之名而無得地之實也
且王攻楚之日四國必悉起兵以應王秦楚之
兵構而不離韓魏氏將出兵而攻留方與銍胡
陵碭蕭相故宋必盡齊人南面史記南泗北必舉

此皆平原四達膏腴之地也而使獨攻王破楚以肥韓魏於中國而勁齊韓魏之彊足以枝於秦齊南以泗水為境東負海北倚河而無後患天下之國莫彊於齊魏齊魏得地保利而詳事下吏一年之後為帝未能其於楚禁王之為帝有餘矣夫以王壤土之博人徒之衆兵革之彊一舉事而樹怨於楚出令韓魏歸帝重齊是王失計也臣為王慮莫若善楚秦楚合為一而以臨韓韓必拱手王施之以東山之險帶以曲河之利韓必為關內之候若是而王以十萬伐鄭梁氏寒心許陽陵嬰城而上蔡召陵不往來也如

史記索隱作禁王云楚誤此書又因誤本史記而失於詳正也

東山宋本山東史作東山侯史作侯

此而魏亦關內候矣王一善楚而關內兩萬乘

侯史作

之主注入地於齊齊右壤可拱手而取也王之

地一作經史作兩海要約天下是燕趙無齊楚齊

楚無燕趙然後危動燕趙直搖齊楚此四國者

不待痛而服也昭王曰善於是乃止白起謝韓

魏發使賂楚約為與國黃歇受約歸楚解弱楚

之禍全彊秦之兵黃歇之謀也

秦趙戰於長平趙不勝亡一都尉趙王召樓昌

與虞卿曰軍戰不勝尉係死寡人將束甲而赴

之樓昌曰無益也不如發重寶使而為構虞卿

曰昌言構者以為不構軍必破也而制構者在

秦且王之論秦也。欲破王之軍乎？不耶？王曰：秦不遺餘力矣。必且破趙軍。虞卿曰：王聽臣發使出重寶以附楚魏。楚魏欲王之重寶，必內吾使。吾使入楚魏，秦必疑天下恐天下之合從，必一心如此，則構乃可爲也。趙王不聽。與平陽君爲構，發鄭朱入秦。秦內之。趙王召虞卿曰：寡人使平陽君爲構，秦秦已內鄭朱矣。虞卿以爲如何？對曰：王不得構，軍必破矣。天下之賀戰勝者皆在秦，鄭朱貴人也。而入秦，秦王與應侯必顯重以示天下。楚魏以趙爲構，必不救王，則構不可得也。應侯果顯鄭朱以示天下，賀戰勝者終不肯構。

長平大敗，遂圍邯鄲。爲天下笑。不從虞卿之謀也。秦旣解圍邯鄲，而趙王入朝，使趙郝約事於秦，割六縣而構。虞卿謂趙王曰：秦之攻王也，倦而歸乎？其力尚能進之，愛王而不攻乎？王曰：秦之攻我也，不遺餘力矣。必以倦歸也。虞卿曰：秦以其力攻其所不能取，倦而歸。王又攻其力之所不能取，以送之，是助秦自攻也。來年秦復攻王，王無救矣。王以虞卿之言告趙郝，曰：虞卿能量秦力之所至乎？誠知秦力之所不進，此彈丸之地，不樂令秦來年復攻於王。王得無割其內而構乎？王曰：請聽子割矣。子能必來年秦之

不復攻乎趙郝曰此非臣所敢任也他日三晉之交於秦相若也今秦善韓魏而攻王王之所
以事秦者必不如韓魏也今臣之爲足下解負
親之攻開關通弊齊交韓魏至來年而獨取攻
於秦王之所以事秦必在韓魏之後也此非臣
之所敢任也王以告虞卿虞卿對曰郝言不構
來年秦復攻王王得無復割其內而構乎今構
郝又不能必秦之不復攻也雖割何益來年復
攻又割其力之所不能取以構此自盡之術也
不如無構秦雖善攻不能取六具趙雖不能守
亦不失六城秦倦而歸兵必疲我以五縣收天

弊當作

下以攻罷秦是我失之於天下而取償於秦也
吾國尚利孰與坐而割地自弱以彊秦今郝曰
秦善韓魏而攻趙者必王之事秦不如韓魏也
是使王歲以六城事秦也坐而地盡來年秦復
來割王將予之乎不予是弃前功而挑秦禍也
予之即無地而給之語曰彊者善攻而弱者不
能守今坐而聽秦秦兵不弊而多得地是彊秦
而弱趙也以益彊之秦而割愈弱之趙其計固
不止矣且王之地有盡而秦之求無已以有盡
之地給無已之求其勢必無趙矣計未定樓緩
從秦來趙王與樓緩計之曰予秦地與無予孰

予宗本皆作與

吉緩辭讓曰此非臣之所能知也王曰雖然試
言公之私樓緩對曰亦聞夫公父文伯母乎公
父文伯仕於魯病死女子爲自殺於房中者二
人其母聞之不肯哭也其相室曰焉有子死而
不哭者乎其母曰孔子賢人也逐於魯而是人
不隨也今死而婦人爲自殺者二人若是者必
其於長者薄而於婦人厚也故從母言是爲賢
毋從妻言是必不免爲妬婦其言一也言者異
則人心變矣今臣新從秦來而言勿予則非計
也言予之恐王以臣爲秦也故不敢對使臣得
爲大王計不如予之王曰諾虞卿聞之曰此飾

如宋本
訛必

說也王慎勿予樓緩聞之往見王王又以虞卿
之言告樓緩樓緩對曰不然虞卿得其一不得
其二夫秦趙構難而天下皆說何也曰吾且因
彊而乘弱矣今趙兵困於秦天下之賀戰勝者
必盡在於秦矣故不如亟割地爲和以疑天下
而慰秦之心不然天下將因秦之怒乘趙之弊
而瓜分之趙見亡何秦之圖乎故曰虞卿得其
一不得其二願王以此決之勿復計也虞卿聞
之往見王曰危哉樓子之所以爲秦者是愈疑
天下而何慰秦之心哉獨不言示天下弱乎且
臣言勿予非固勿予而已也秦索六城於王而

王以六城賂齊齊秦之深讎也得王之六城并力而西擊秦齊之聽王不待辭之畢也則是王失之於齊而取償於秦也而齊趙之讎可以報矣而示天下有能爲也王以此爲發聲兵未窺於境臣見秦之事賂而反構於王也從秦爲構韓魏聞之必盡重王重王必出重寶以先於王則是王一舉而結三國之親而與秦易道也趙王曰善即發虞卿東見齊王與之謀秦虞卿之謀行而趙霸此存亡之樞機樞機之發開不及旋踵是故虞卿一言而秦之震懼趨風馳指而請備故善謀之臣其於國豈不重哉微虞卿趙以亡矣

魏請爲從趙孝成王召虞卿謀過平原君平原君曰願卿之論從也虞卿入見王曰魏請爲從對曰魏過王曰寡人固未之許對曰王過王曰魏請從卿曰魏過寡人未之許又曰寡人過然則從終不可耶對曰臣聞小國之與大國從事也有利大國受福有敗小國受禍今魏以小請其禍而王以大辭其福臣故曰王過魏亦過竊以爲從便王曰善乃合魏爲從使虞卿卿久用於趙趙必霸會虞卿以魏齊之事相棄相而歸不用趙旋亡

劉向新序卷第九

新序卷第十

陽朔元年二月癸卯議左都水使者光祿大夫臣劉向上

善謀下第十

沛公與項籍俱受令於楚懷王曰先入咸陽者

王之沛公將從武關入至南陽守戰南陽守

守宛城堅守不下沛公引兵圍宛三匝南陽守

欲自殺其舍人陳恢止之曰死未晚也於是恢

乃踰城見沛公曰臣聞足下約先入咸陽者王

之今足下留兵盡日圍宛宛大郡之都也連城

數十人民衆蓄積多其吏民自以為降而死故

皆堅守棄城足下攻之死傷者必多死者未收

傷者未瘳足下曠日則事留引兵而去宛完繕

守戰二字疑衍
文據史
則上文
有脫文

弊甲砥礪凋兵而隨足下之後足下前則失咸陽之約後有彊宛之患竊為足下危之為足下計者莫如約宛守降封之因使止守引其甲棄與之西擊諸城未下者聞聲爭開門而待足下通行無所累沛公曰善乃以宛守為殷侯封陳恢千戶引兵西無不下者遂先入咸陽陳恢之謀也漢王既用滕公蕭何之言擢拜韓信為上將軍引信上坐王問曰丞相數言將軍將軍何以教寡人計策信謝因問王曰今東向爭權天下豈非項王邪曰然大王自斷史作勇勇史有彊孰與項王漢王默然良久曰不如也信再拜賀曰唯

聲宋本風

漢王宋本提行

信亦以為大王不如也然臣嘗事楚請言項王為人項王喑噁叱咤千人皆廢然不能任屬賢將此匹夫之勇耳項王見人恭謹言語响响人疾病涕泣分食飲至使人有功當封爵印劄綬弊忍不能與此所謂婦人之仁項王雖霸天下而臣諸侯不居關中都彭城又背義帝約而以親愛王諸侯不平諸侯之見項王遷逐義帝江南亦皆歸逐其主自王善地項王所過無不殘滅多怨百姓不附特劫於威彊服耳名雖為霸王實失天下心故曰其彊易弱今大王誠反其道任天下武勇何不誅以天下城邑封功臣何

食飲宋本飲食

不服以義兵從思東歸之士何不散且三秦王
為秦將秦弟_子數歲所殺亡不可勝計又欺其
衆降諸侯至新安項王詐坑秦降卒二十餘萬
人唯獨邯欣翳脫秦父兄怨此三人痛入骨髓
今楚彊以威王此三人秦民莫愛大王之入武
關秋毫無所害除秦苛法與秦約法三章且秦
民無不欲得大王王秦者於諸侯約大王當王
關中民戶知之大王失職之蜀民無不恨者今
大王舉而東三秦可傳檄而定也於是漢王喜
自以為得信晚遂聽信計部署諸將所擊八月
漢王東出秦民歸漢王遂誅三秦王定其地收

諸侯兵討項王定帝業韓信之謀也

趙地亂武臣張耳陳餘定趙地立武臣為趙王
張耳為相陳餘為將軍趙王間出為燕軍所得
燕囚之欲與三分其地乃歸王使者至燕輒殺
之以固求地張耳陳餘患之有廝養卒謝其舍
中人曰吾為公說燕與趙王載歸舍中人皆笑
之曰使者往十輩死若何以能得王廝養卒曰
非若所知乃洗沐往見張耳陳餘遣行見燕王
燕王問之對曰賤人希見長者願請一卮酒已
飲又問之復曰賤人希見長者願復請一卮酒
與之酒卒曰王知臣何欲燕王曰欲得而王耳卒

曰君知張耳陳餘何人也燕王曰賢人也曰君知其意何欲曰欲得其王耳趙卒笑曰君未知兩
人所欲也夫武臣張耳陳餘杖馬策下趙數十
城此亦各欲南面而王豈為卿相哉夫臣與主
豈可同日道哉顧其勢始定未敢三分而王且
以長少先立武臣為王以持趙心今趙地已服
此兩人亦欲分趙而王時未可羸今君囚趙王
此兩人名為求趙王實欲燕殺之此兩人分趙
自立夫以一趙尚易燕況兩賢王左提右挈執
直義而以責不直之弱燕滅無日矣燕王以為
然乃遣趙王養卒為御而歸遂得反國復立為

長少宗
本少長

王趙卒之謀也

酈食其號酈生說漢王臣聞之知天之天者王
事可成不知天之天者王事不可成王都以為民
為天而民以食為天夫教倉天下轉輸久矣臣
聞其下乃有藏粟甚多楚人拔滎陽不堅守教
倉乃引而東令謫過卒分守成臯此乃天所以
資漢方今楚易取而漢反却自奪奪其使臣竊以為
過矣且兩雄不俱立楚漢久相持不決百姓騷
動海內搖蕩農夫釋耒工女下機天下之心未
有所定也願陛下急復進兵收取滎陽據敖倉
之粟塞成臯之險杜太行之路距蜚狐之口守

白馬之津以示諸侯形制之勢則天下知所歸矣漢王曰善乃從其計畫復守敖倉卒糴食不盡以擒項氏其後吳楚反將軍竇嬰周亞夫復據敖倉塞成臯如前以破吳楚皆酈生之謀也酈生說漢王曰方今燕趙已復唯齊未下今田橫據千里之齊田間據二十萬之軍於歷城諸田宗彊負海阻河濟南近楚民多變詐陛下雖遣數十萬師未可以歲月下也臣請奉明詔說齊王令稱東藩於是使酈生食其說齊王曰王知天下之所歸乎王曰不知也曰王知天下之所歸則齊國可得而有也若不知天下所歸則

齊國未可保也齊王曰天下何歸曰歸漢王曰先生何以言之曰漢王與項王戮力西面擊秦約先入咸陽者王之漢王先入咸陽項王倍約不與而王漢中項王遷殺義帝漢王起蜀漢之兵擊三秦出關而責義帝之處收天下之兵立諸侯之後降城即以侯其將得賂即以予其士與天下同其利豪傑賢才皆樂為其用諸侯之兵四面而至蜀漢之粟方船而下項王有倍約之名殺義帝之實於人之功無所記於人之過無所忘戰勝而不得其賞拔城而不得其封非項氏莫得用事為人刻印刻而不能授攻城得

賂積財而不能賞天下畔之賢才怨之而莫爲
之用故天下之事歸於漢王可坐而策也夫漢
王發蜀漢定三秦涉西河之外乘上黨之兵下
井陘誅成安破北魏舉三十二城此蚩尤之兵
非人之力也今已據敖倉之粟塞成臯之險守
白馬之津杜太行之阪距蜚狐之口天下後服
者先亡矣王疾下漢王齊國社稷可得而保也
不下漢王危亡可立而待也田橫以爲然即聽
酈生罷歷下兵戰守之備與酈生日縱酒此酈
生之謀也及齊人蒯通說韓信曰足下受詔擊
齊何故止將三軍之衆不如一豎儒之功可因
齊無備擊之韓信從之酈生爲田橫所害後信
通亦不得其所由不仁也

漢三年項羽急圍漢王滎陽漢王恐憂與酈生
謀撓楚權酈生曰昔湯伐桀封其後於杞武王
伐紂封其後於宋今秦無德弃義侵伐諸侯社
稷滅六國之後使無立錐之地陛下誠復立六
國後畢授印已此君臣百姓必皆戴陛下德莫
不嚮風慕義願爲臣妾德義已行陛下南嚮稱
霸楚必斂衽而朝漢王曰善趣刻印先生因行
佩之矣酈先生未行張良從外求謁漢王方食
曰子房前客有爲我計撓楚權者具以食其言

告之曰其於子房意如何良曰誰為陛下畫此
計者陛下事去矣漢王曰何哉良對曰臣請借
前箸而籌之曰昔湯伐桀而封其後於祀者斯
能制桀之死命也陛下能制項籍之死命乎曰
未能也其不可一也武王伐紂而封其後於宋
者斯能得紂之頭也今陛下能得項籍之頭乎
曰未能也其不可二矣武王入殷表商容之間
軾箕子之門封比干之墓今陛下能封聖人之
墓表賢人之間軾智者之門乎曰未能也其不
可三矣發鉅橋之粟散鹿臺之錢以明貧寡
陛下能散府庫以賜貧羸乎曰未能也其不可

四矣殷事已畢偃革為軒倒載干戈以示天下
不復用兵今陛下能偃革倒載干戈乎曰未能
也其不可五也休馬於華山之陽以示無所用
今陛下能休馬無所用乎曰未能也其不可六
矣休牛於桃林文能放牛桃林以示不復輸糧手不木不運糧今陛下能休牛
不復輸糧乎曰未能也其不可七矣且夫天下
游士捐其親戚棄墳墓去故舊從陛下游者皆
日夜望尺寸之地今復立韓魏燕趙齊楚之後
其王皆復立游士各歸事其主從其親戚反其
故舊墳墓陛下誰與取天下乎其不可八也且
夫楚雖無彊六國復撓而從之陛下焉得而臣

之乎誠用容之計陛下之事去矣漢王輟食吐
哺罵曰豎儒幾敗乃公事今趣銷印止不使遂
并天下之兵誅項籍定海內張子房之謀也楚雖無疆漢史作楚雖無疆
漢五年追擊項王陽夏南止軍與淮陰侯韓信
建成侯彭越期會而擊楚軍至固陵不會楚擊
漢軍大破之漢王復入壁深塹而守之謂張子
房曰諸侯不從約奈何對曰楚兵且破而未有
分地其不至固宜君王能與共天下今可立致
也則不能事未可知也君王能自陳以東傅海
盡與韓信睢陽以北至穀城盡與彭越使各自
為戰則楚易敗也漢王乃使使者告韓信彭越

曰并力擊楚楚已破自陳以東傅海與齊王睢
陽以北穀城與彭相國使者至韓信彭越皆喜
報曰請今進兵韓信乃從齊行彭越兵自梁至
諸侯來會遂破楚軍于垓下追項王誅之於淮
津二君之功張子房之謀也一作張子房之謀也

漢六年正月封功臣張子房未嘗有戰鬪之功
高皇帝曰運籌策帷幄之中決勝千里之外子
房功也子房自擇齊三萬戶良曰始臣起下邳
與上會留此天以臣授陛下陛下用臣計幸而
時中臣願封留足矣不敢當齊三萬戶乃封良
為留侯及蕭何等其餘功臣皆未封群臣自疑

恐不得封咸不自安有搖動之心於是高皇帝
在雒陽南宮上臺見群臣往往相與坐沙中語
上曰此何語留侯曰陛下不知乎謀反耳上曰
天下屬安何故而反留侯曰陛下起布衣與此
屬定天下陛下已為天子而所封皆蕭曹故人
所誅皆平生怨怨今軍吏計功以天下不足以
徧封此屬畏陛下不能盡封又見疑平生過失
及誅故即聚謀反耳上乃憂曰為將奈何留侯
曰上平生所憎群臣所共知誰最甚者上曰雍
齒與我有故榮書事數窘辱我欲殺之為其功多故不
忍留侯曰榮時有故怨今急先封雍齒以示群臣群臣見雍

齒得封即人人自堅矣於是上置酒封雍齒為
什方侯而急詔趣丞相御史定功行封群臣罷
酒皆喜曰雍齒且侯我屬無患矣還倍畔之心
銷邪道之謀使國家安寧累世無患者張子房
之謀也

高皇帝五年齊人婁敬成隴西過雒陽脫輅輓
見齊人虞將軍曰臣願見上言便宜事虞將軍
欲與鮮衣婁敬曰臣衣帛衣帛見衣褐衣褐見
不敢易虞將軍入言上上召見賜食已而問敬
對曰陛下都雒陽豈欲與周室比隆哉上曰然
敬曰陛下取天下與周室異周之先自后稷堯

封之邠積德累善十餘世公劉避桀居邠大王
以狄伐去邠杖馬策居岐國人爭歸之及文王
爲西伯斷虞芮訟始受命呂望伯夷自海濱來
歸之武王伐紂不期而會孟津上八百諸侯滅
殷成王即位周公之屬傅相乃營成周雒邑以
爲天下中諸侯四方納貢職道里均矣有德則
易以王無德則易以亡凡居此者欲令周務德
以致人不欲恃險阻令後世驕奢以虐民及周
之衰分爲兩天下莫朝周不能制非德薄形勢
弱也今陛下起豐擊沛收卒三千人以之徑往
卷蜀漢定三秦與項羽大戰七十小戰四十使

天下民肝腦塗地父子暴骨中野不可勝數哭
泣之聲未絕傷夷者未起而欲比隆成康周公
之時臣竊以爲不侔矣且夫秦地被山帶河四
塞以爲固卒然有急百萬之衆可具因國秦之故
資甚美膏腴之地此謂天府陛下入關而都山
東雖亂秦故地可全而有也夫與人鬪而不搯
其亢拊其背未全勝也高皇帝疑問左右大臣
皆山東人多勸上都雒陽東有成皋西有着滎
倍河海嚮伊洛其固亦足恃且周王數百年秦
二世而亡不如都周留侯張子房曰雒陽雖有
此固國中小不過數百里田地狹四面受敵此

非用武之國夫關中左肴函右隴蜀沃野千里南有巴蜀之饒北有故宛之利阻三面守一隅東向制諸侯諸侯安定河渭漕輓天下西給京師諸侯有變順流而下足以委輸此所謂金城千里天府之國也婁敬說是也於是高皇帝即日駕西都關中由是國家安寧雖彭越陳豨盧綰之謀九江燕代之兵及吳楚之難關東之兵雖百萬之師猶不能以為害者由保仁德之惠守關中之固也國以求安婁敬張子房之謀也上曰本言都秦地者婁敬也婁者乃劉也賜姓劉氏拜為郎中號曰奉春君後卒為建信侯留

留侯本提行

侯張子房於漢已定性多疾即導引不食穀杜門不出歲餘上欲廢太子立戚氏夫人子趙王如意大臣多爭未能得堅決者也呂后恐不知所為人或謂呂后曰留侯善畫計策上信用之呂后乃使建成侯呂澤劫留侯曰君常為上計今日欲易太子君安得高枕卧留侯曰始上數在困急之中幸用臣今天下安定以愛幼欲易太子骨肉間雖臣等有餘人何益呂澤彊要曰為我畫計留侯曰此難以口舌爭顧上有所不能致者天下有四人園公綺里季夏黃公角里先生此四人者年老矣皆以上慢侮士故逃匿

宋本角里本用又校

山中義不爲漢臣然上高此四人公誠能無愛金玉璧帛令太子爲書卑辭以安車迎之因使辯士固請宜來來以爲客時時從入朝令上見之上見之即必異問之問之上知此四人亦一助也於是吕后令澤使人奉太子書卑辭厚禮迎四人四人至舍吕澤所至十二年上從破黥布軍歸疾益甚愈欲易太子留侯諫不聽因疾不視事太傅叔孫通稱說引古以死爭太子上佯許之猶欲易之及燕置酒太子侍四人者從太子皆年八十有餘鬢眉皓白衣冠甚偉上怪而問曰何爲者四人前對各言其姓名上乃驚

曰吾求公數歲公避逃我今公何自從吾兒游乎四人皆對曰陛下輕士善罵臣等義不辱故恐而亡匿聞太子爲人子孝仁敬愛士天下莫不延頸願爲太子死者故來請上曰煩公幸卒調護太子四人爲壽已畢起去上目送之召戚夫人指示四人者曰我欲易之彼四人輔之羽翼已成難動矣吕氏真而主矣戚夫人泣下上曰爲我楚舞吾爲若楚歌歌曰鴻鵠高蜚一舉千里羽翮已就橫絕四海橫絕四海當可奈何雖有矰繳尚安所施歌數闋戚夫人噓唏流涕上起去罷酒竟不易太子者留侯召四人之謀也

漢十一年九江黥布反高皇帝疾欲使太子往擊之是時園公綺里季夏黃公角里先生已侍太子聞太子將擊黥布四人相謂曰凡來者將以存太子太子將兵事危矣乃說建成侯曰太子將兵有功則位不益無功從此受禍矣且太子所與俱諸將皆嘗與上定天下梟將也乃使太子將之此無異使羊將狼也皆不肯為用盡力其無功必矣臣聞毋愛者抱子今戚夫人日夜侍御趙王常廢抱前前終不使不肖子居愛子上明乎其代太子位必矣君何不急謂呂后承間為上泣言黥布天下猛將善用兵諸將皆

抱子宋
作子疑

陛下故等倫乃令太子將此屬無異使羊將狼莫為用且使布聞之即鼓行而西爾上雖疾卧護之諸將不敢不盡力雖苦彊為妻子計載輜車卧而行於是呂澤立夜見呂后呂后承間為上泣而言如四人意上曰吾惟豎子故不足遣乃公自行爾於是上自將東群臣居守皆送至霸上留侯疾彊起至曲郵見上曰臣宜從疾甚楚人剽疾願上無與楚人爭鋒因說上曰令太子為將軍監關中諸侯兵上謂子房雖疾彊起卧而傳太子是時叔孫通已為太子太傅留侯行少傅事漢遂誅黥布太子安寧國家晏然此

四公子之謀也

齊悼惠王者孝惠皇帝二年悼惠王入朝孝惠
皇帝與悼惠王讌飲乃行家人禮同席呂太后
怒乃進鴆酒孝惠皇帝知欲代飲之乃止悼惠
王懼不得出城上車太息內史參乘怪問其故
悼惠王具以狀語內史內史曰王寧亡十城耶
將亡齊國也悼惠王曰得全身而已何敢愛城
哉內史曰魯元公主太后之女大王之弟也大
王封國七十餘城而魯元公主湯沐邑少大王
誠獻十城爲魯元公主湯沐邑內有親親之恩
外有順太后之意太后必大喜是亡十城而得
六十城也悼惠王曰善至邸上奏獻十城爲魯
元公主湯沐邑太后果大悅受邑厚賜悼惠王
而歸之國遂安齊內史之謀也

孝武皇帝時大行王恢數言擊匈奴之便可以
除邊境之害欲絕和親之約御史大夫韓安國
以爲兵不可動孝武皇帝召群臣而問曰朕飾
子女以配單于幣帛文錦賂之甚厚今單于逆
命加慢侵盜無已邊郡數驚朕甚閔之今欲舉
兵以攻匈奴如何大行臣恢再拜稽首曰善陛
下不言臣固謁之臣聞全代之時北未嘗不有
彊胡之敵內連中國之兵也然尚得養老長幼

樹種以時倉廩常實守禦之備具匈奴不敢輕
慢也今以陛下之威海內為一家天下同任遣
子弟棄邊守塞轉粟輓輸以為之備而匈奴侵
盜不休者無他不痛之患也臣以為擊之便御
史大夫臣安國稽首再拜曰不然臣聞高皇帝
嘗圍於平城匈奴至而投鞍高於城者數所平
城之厄七日不食天下歎之及解圍反位無忿
怨之色雖得天下而不報平城之怨者非以力
不能也夫聖人以天下為度者也不以己之私
怒傷天下之公義故遣劉敬結為和親至今為
世利孝文皇帝嘗屯天下之精兵於嘗然

武無尺寸之功天下黔首約要之民無不憂者
孝文皇帝悟兵之不可宿也乃為和親之約至
今為後世利臣以為兩主之迹足以為效臣故
曰勿擊便大行曰不然夫明於形者分則不過
於事察於動者用則不失於利審於靜者恬則
免於患高帝被堅執銳以除天下之害蒙矢石
沾風雨行幾十年伏尸滿澤積首若山死者什
七存者什三行者垂泣而倪於兵夫以天下未
力厭事之民而蒙匈奴飽饑其勢不便故結和
親之約者所以休天下之民高皇帝明於形而
以分事通於動靜之時蓋五帝不相同樂三王

不相襲禮者非故相反也各因世之宜也教與時變備與敵化守一而不易不足以子民今匈奴縱意日久矣侵盜無已係虜人民成卒死傷中國道路樵車相望此仁人之所哀也臣故曰擊之便御史大夫曰不然臣聞之利不什不易業功不百不變常是故古之人君謀事必就聖發政必擇語重作事也自三代之盛遠方夷狄不與正朔服色非威不能制非強不能服也以爲遠方絕域不收之民不足以煩中國也且匈奴者輕疾悍亟之兵也畜牧爲業弧弓射獵逐獸隨草居處無常難得而制也至不及圖去不

收宋本

可追來若歲兩解若收電今使邊鄙久廢耕織之業以支匈奴常事其勢不權臣故曰勿擊爲便大行曰不然夫神蛟濟於淵而鳳鳥乘於風聖人因於時昔者秦繆公都雍郊地方三百里知時之變攻取戎辟地千里并國十二隴西北地是也其後蒙恬爲秦侵胡以河爲境累石爲城積木爲寨匈奴不敢飲馬北河置烽燧然後敢牧馬夫匈奴可以力服也不可以仁畜也今以中國之大萬倍之資遣百分之一以攻匈奴譬如以千石之弩射癰潰疽必不留行也則北發月氏可得而臣也臣故曰擊之便御史大夫

漢史作以飽待飢
正以待其勞故按兵

曰不然臣聞善戰者以飽待飢安行定舍以待
其勞其勞整治施德以待其亂按兵奮衆深入伐國
墮城故常坐而役敵國此聖人之兵也夫衝風
之衰也不能起毛羽彊弩之末力不能入魯縞
盛之有衰也猶朝之必暮也今卷甲而輕舉深
入而長驅難以爲功夫橫行則中絕從行則迫
脅徐則後利疾則糧乏不至千里人馬絕飢勞
以遇敵正漢史作遺人獲也意者有他詭妙可以擒之
則臣不知不然未見深入之利也臣故曰勿擊
之便大行曰不然夫草木之中霜霧不可以風
過清水明鏡不可以形逝也通方之人不可以

文亂今臣言擊之者固非發而深入也將順因
單于之欲誘而致之邊吾伏輕卒銳士以待之
陰遮險阻以備之吾勢以成或當其左或當其
右或當其前或當其後單于可擒百全必取臣
以爲擊之便於是遂從大行之言孝武皇帝自
將師伏兵於馬邑誘致單于單于既入塞道覺
之奔走而去其後交兵接刃結怨連禍相攻擊
十年兵凋民勞百姓空虛道殣相望樵車相屬
寇盜滿山天下搖動孝武皇帝後悔之御史大
夫桑弘羊請佃輪臺詔卻曰當今之務務在禁
暴止擅賦今乃遠西佃非所以慰民也朕不忍

聞封丞相號曰富民侯遂不復言兵事國家以
寧繼嗣以定從韓安國之本謀也

孝武皇帝時中大夫主父偃為策曰古諸侯不
過百里彊弱之形易制也今諸侯或連城數十
地方千里緩則驕易為淫亂急則阻其彊而合
從謀以逆京師今以法割之即逆節萌起前日
晁錯是也今諸侯子弟或十數而適嗣代立餘
雖骨肉無尺地之封則仁孝之道不宣願陛下
今諸侯得推恩分子弟以地侯之彼人人喜得
所願上以德施實勸其國而稍自消弱矣於是
上從其計因關馬及弩不得出絕遊說之路重
附益諸侯之法急註誤其君之罪諸侯王遂以
弱而合從之事絕矣主父偃之謀也

康熙庚寅借義門師校正本對勘師本乃從懋橋
卷李氏借得陽山顧大有舊藏宋槧本校定也

七月八日杲記

康熙丁酉六月得傳是樓宋本錄牧翁題識復改

定十餘字

杲又記

刻劉氏二書後序

賜進士第亞中大夫山西布政司左叅政前刑科都給事中靈寶彭乾謨

夫書所以翼經而裨教也典謨以
經世訓詁以釋經析義以明倫研
物以察理作者垂法誦法者制焉
述者明法守法者徇焉經非群書
以翼之則經或幾乎毀矣教非群
書以闡之則教或幾乎息矣是故
言不足以翼經義不足以啓訓是

曲學之見非通方之論也劉氏二
書者劉向所著說苑新序也向本
漢宗室研窮六經博極群籍嘗夜
讀書感太乙之精臨視究天人之
奧洞理亂之源明古今之情達事
物之變勤敏博綜其用心亦勞矣
詔授黃門侍郎給事中憤王氏
擅政權移外戚援古證今抗疏極
論天子感激嘆息而不能用噫誠

有幾先之炳而識明哲之學也彼
附勢者毀節獨行者賈禍杜欽谷
求揚雄稱漢儒宗而仕僞投閣爲
世大譏向數困於讒而不改其操
乃父子明經發論竟免於難可謂
處常事而知其經遭變事而知其
權矣自今觀之其文直其事核辯
而不穢詳而有體真勒成一家之
言矣使當時得行其學則王業奚

移於新室漢鼎胡遷於東都古稱
直諒多聞謂之益友而曾南豐氏
謂其不當於理道豈其然哉然是
二書學者類未喻其旨多以爲稗
官小說者埒也維時

代巡受堂楊公觀風三晉行部至
汾適宗封弗檢至治兵相攻廼歎
曰

天潢繁衍惟汾鮮克由禮亦惟汾顧

不能仰體

敦睦之義非天之降才爾殊也未
嘗學問之過也爰檄汾守張朝憲
氏同知黃康氏刻二書於汾俾宗
子誦習若曰劉向非漢宗親哉丕
昭善誘之教洪開向學之端夫故
可以翼經而裨教也記曰作者之
謂聖述者之謂明明聖者述作之
謂也公其得所述也夫

跋
史稱劉向采傳記行事著新序說苑凡五十篇奏之是五十篇當合而觀之矣後世述行其書或一於說苑而新序別出至使好古綴文之士言病於支離不亦偏哉又稱其博物洽聞通達古今其言有補於世豈非直諫多聞古之益友與是五十篇者又裨教廣益之書也

君子而無匡世之心尚友之志則
已有是心志將不有感於斯文乎
受堂楊公按部正儀兼總條貫為
聖主贊中和之極闡文獻之序於以
迪教而明學始取新序說苑二書
令有司竝為一部刻之復叙論其
旨歸示觀法焉讀其書者亦有感
於斯文可也方經表校刻左叅政
彭公寶董正之知州張朝憲同知
黃宸實祇事之胤州之遺黎也謹
識其末簡嘉靖己未孟冬河汾山
人孔天胤撰



Large stylized watermark or seal impression, possibly reading '圖書館藏' (Library Collection).

館藏
藏書

國立
中央
圖書館

足

